

Newspaper	Berita Harian
Date	15/08/2017

# Tindakan kaitkan UMNO cubaan alih perhatian perpecahan PPBM



*Tiga remaja direman empat hari oleh Mahkamah Majistret Shah Alam berhubung insiden pada Program Nothing To Hide 2.0.*

BH-15/8/2017  
Pg. 5

**Kuala Lumpur:** Tindakan Parti Pribumi Bersatu Malaysia (PPBM) mengaitkan UMNO dengan kekecohan forum 'Nothing To Hide 2.0' kelmarin adalah cubaan untuk menutup tindakan memalukan ahli parti pimpinan Tun Dr Mahathir Mohamad itu.

Setiausaha Akhbar Perdana Menteri, Datuk Seri Tengku Sariffuddin Tengku Ahmad, berkata PPBM bertanggungjawab terhadap majlis anjurannya yang dihadiri kepimpinan dan penyokong parti itu.

Beliau berkata, tuduhan liar mengaitkan UMNO dan Perdana Menteri, Datuk Seri Najib

Razak dengan kekecohan itu oleh pemimpin parti itu, termasuk Menteri Besar Selangor yang juga Timbalan Presiden PKR, Datuk Seri Mohamed Azmin Ali adalah palsu, melulu dan tidak sepatutnya dibuat.

## **Bangkitkan rasa marah**

"Ini adalah cubaan jelas untuk mengalihkan perhatian daripada perpecahan PPBM dan satu lagi contoh tindakan pakatan pembangkang untuk membangkitkan rasa marah dan benci orang ramai terhadap kerajaan.

"Jika pakatan pembangkang tidak berupaya untuk menganjurkan forum tanpa kekecohan,

maka kita boleh bayangkan apa yang akan mereka lakukan terhadap Malaysia.

"Jelas ia akan membawa bencana kepada negara jika pembangkang diketuai DAP mendapat kuasa pada pilihan raya umum akan datang," katanya dalam satu kenyataan, semalam.

'Forum Nothing Hide 2.0' di Kompleks Belia dan Kebudayaan Seksyen 7, Shah Alam, bertukar ganas apabila sekumpulan penonton tidak puas hati dengan penjelasan Dr Mahathir mengenai peristiwa Memali pada 1985.

Keadaan mula menjadi tegang apabila Dr Mahathir enggan menjawab soalan seorang

hadirin, sama ada sabitan kes liwat terhadap Datuk Seri Anwar Ibrahim ketika pentadbiran bekas Perdana Menteri itu adalah benar atau hanya bermotifkan politik.

Tengku Sariffuddin berkata, realitinya penyokong pembangkang yang hadir di forum itu kecewa dengan kegagalan Dr Mahathir menjawab soalan berhubung skandal sepanjang 22 tahun pentadbirannya, termasuk isu pemenjaraan Anwar dan peristiwa Memali.

Katanya, berdasarkan insiden itu, forum 'Nothing To Hide 2.0' sepatutnya menjadi forum 'Everything To Hide'.